

Mensahe 3

Ang Tiunayng Kahulogan ug Pinadayag sa Sinagol nga Igdihog isip Balaang Lana nga Igdihog— Hingpit nga Hulagway sa Sinagol, Malangkobon-sa-tanan nga Espiritu sa Nahikay nga Tulo-usang Dios

Basahong Kasulatan: Exo. 30:22-30; 1 Cor. 15:45b; Juan 7:37-39; Fil. 1:19

- I. Ang balaang lana nga igdihog, nga sinagol nga igdihog nga lana sa oliva ug upat ka panakot, “nga gisakot sumala sa buhat sa tigsakot,” hingpit nga hulagway sa Espiritu ni Jesucristo, sa sinagol, malangkobon-sa-tanan, nga Espiritung taghatag-og-kinabuhi sa nahikay nga Tulo-usang Dios, naingon niana si Cristo sa pagkamatay ug pagkabanhaw Niya—Exo. 30:22-25; 1 Cor. 15:45b; Juan 7:37-39; Fil. 1:19:**
 - A. Ang mga kahulogan sa mga sagol ning sinagol nga lanang igdihog mao kini:**
 1. Ang nag-agay nga mira, nga panakot nga gigamit sa paglubong (Juan 19:39), nagtimaan sa bililhong kamatayon ni Cristo (Rom. 6:3):
 - a. Gigamit sab ang mira isip pawala-sa-sakit sa pagpamenos sa kasakit sa kamatayon; sa gilansang sa krus si Ginoong Jesus, gihatagan Siyag bino nga gisagolag mira aron dili kaayo Siya sakitan—Mar. 15:23.
 - b. Magamit sab ang mira sa pagtambal sa lawas kon dunay lain kini nga mga inagas; daghan kaayong laing inagas ang tawhanon natong kinabuhi, apan makatambal ning problemaha ang kamatayon sa Ginoo didto sa krus.
 2. Ang humot nga canela nagtimaan sa kahumot ug pagkaepektibo sa kamatayon ni Cristo (Rom. 8:13):
 - a. Ikareseta ang canela sa pagpalagsik sa maluyahong kasingkasing.
 - b. Kon iaplikar nato ang kamatayon sa Ginoo diha sa Espiritu sa pagkatawo nato sa sulod, malagsik ang atong kasingkasing aron magmalipayon ta diha sa Ginoo—Fil. 4:4; Neh. 8:10.
 3. Ang humot nga calamo, nga gikan sa tangbo nga nagtubo paitaas diha sa lamakan o lapokong dapit, nagtimaan sa bililhong pagkabanhaw ni Cristo—Efe. 2:6; Col. 3:1; 1 Ped. 1:3.
 4. Ang casia, nga gigamit sa karaang mga panahon nga pang-abog sa gagmayng mananap ug mga bitin, nagtimaan sa gahom sa pagkabanhaw ni Cristo; giabog sa casia ang tanang daotang “insekto” ug ilabi na ang karaang bitin, ang yawa—Fil. 3:10.
 5. Ang lana sa oliva nga sagolanan sa sinagol nga igdihog nagtimaan sa Espiritu sa Dios nga sagolanan sa sinagol nga Espiritu—Gen. 1:2.
 - B. Kay nagtimaan man ang numero kwatro sa mga binuhat (Ezeq. 1:5), nga ang tawo maoy ulo (Gen. 1:26), ug nagtimaan ang numero uno sa bugtong-talagsaong Dios (Deut. 4:35; 1 Tim. 2:5), nagtimaan ang upat ka panakot sa pagka-tawo ni Cristo diha sa kabuhatan sa Dios, ug nagtimaan ang usa ka hin nga lana sa oliva sa bugtong-talagsaong Dios lakip na sa pagkadios Niya; tungod niana, ang panagsakot sa lana sa oliva sa upat ka panakot nagtimaan sa pagtapo, pagsagol, sa Dios ug tawo, sa pagkadios ug sa pagka-tawo, diha sa sinagol nga Espiritu—Lev. 2:4 ug nota 3.**
 - C. Gihikay ang lana sa oliva ug ang upat ka panakot pinaagi sa pagpuga o sa pagputol ba, nagtimaan nga nahimong Espiritu ni Cristo ang Espiritu sa Dios (Rom. 8:9) pinaagi sa mga pag-antos ni Cristo (Mat. 26:36).**

- D. Labot pa, ang takos sa upat ka panakot, nga tulo ka tibuok nga taglima ka gatos ka siclo, ang tungatungang lima ka gatos ka siclo gitunga sa duha ka bahin, nagtimaan sa Tulo-usang Dios diha sa pagkabanhaw, nga ang ikaduha, ang Anak, “gitunga” sa pagkamatay Niya sa krus.
- E. Kay sa Biblia numero sa kaakohan man ang lima (25:2 ug nota 1), ang lima ka elemento sa sinagol nga igdihog ug ang tulo ka tibuok nga lima ka gatos ka siclo sa upat ka panakot nagtimaan sa Tulo-usang Dios diha sa pagkabanhaw isip gahom, kahimoan, sa pagpangako.
- F. Kay may kalabotan man sa pagtukod sa Dios ang mga numero tres ug singko (tan-awa ang nota 15² sa Gen. 6), nagtimaan kining mga numeroha diha sa sinagol nga igdihog nga sa sinagol nga Espiritu naay elemento alang sa pagtukod sa Dios.
- G. Basi sa gihisgotan na nga mga kahulogan, ang pagsagol sa upat ka panakot sa lana sa oliva aron mahimong lanang igdihog nagtimaan sa panagsagol sa gihisgotan na nga mga elemento ug sa Espiritu sa Dios pinaagi sa kahikayan sa pagpakatawo, pagkinabuhi ingog tawo, pagkalansang sa krus, pagkabanhaw, ug pagkayab ni Cristo aron magpalugwa sa sinagol nga Espiritu alang sa pagtukod sa walay kataposang puluy-anan sa Dios.

II. Gigamit ang sinagol nga igdihog, ang balaang lana nga igdihog, sa pagdihog sa tabernaculo ug sa tanang kahimanan niini, sa halaran ug sa tanang galamiton niini, sa dulang ug sa tungtonganan niini, ug sa mga sacerdote, aron mabalaan, maginahin, ngadto sa Dios kining tanang butanga alang sa diosnong tuyo Niya—Exo. 30:26-30; 1 Ped. 1:2; 1 Cor. 6:11; Rom. 15:16:

- A. Nagtimaan kining igdihog sa Tulo-usang Dios nga nahikay ug nahingpit pinaagi sa pagpakatawo, pagkalansang sa krus, ug pagkabanhaw ni Cristo aron mahimong malangkobon-sa-tanan nga sinagol nga Espiritu nga modangat sa pinili ug tinubos nga katawhan Niya ug magdihog nila sa Iyang Kaugalingon, magpausa sa Iyang Kaugalingon kanila ug magpausa nila Kaniya—Juan 20:22; 1 Juan 2:20, 27; 2 Cor. 1:21; 1 Cor. 6:17.
- B. Kanang pagdihog, nga paglihok sa sinagol nga Espiritu sa sulod nato, nag-aplikar kanato ug nagdugang sab sa tanang elemento sa nahikay ug nahingpit nga Tulo-usang Dios nganhi sa pagkatawo nato sa sulod aron motubo ang tawo nato sa sulod diha sa diosnong kinabuhi nga dunay diosnong mga elemento ug masagol ta pag-usa sa Dios—Col. 2:19.
- C. Alang ra gyod sa pagdihog sa puluy-anan sa Dios ug sa kahugpongan sa mga sacerdote ang balaang lana nga igdihog (itandi sa 1 Ped. 2:5); busa, kadto rang alang sa puluy-anan sa Dios ug sa pagkasacerdote ang makapahimulos sa sinagol, malangkobon-sa-tanan nga Espiritu.

III. Ang Espiritu sa Dios, nga gitiman-an sa lana sa oliva, dili na lana lang, kondili gisagolan na karon sa pila ka mga sagol; kalabot niini, niingon ang Juan 7:39 nga, “Apan gisulti Niya kini bahin sa Espiritu, nga hapit nang madawat sa mga nanuo ngadto Niya; kay wala pa ang Espiritu, kay wala pa man himayaa si Jesus”:

- A. Nagpasabot kini nga sa wala pa himayaa ang Ginoo, nga mao ang Iyang pagkabanhaw (Luc. 24:26), wala pa ang sinagol nga Espiritu; sa pagkabanhaw na ni Cristo nakompleto ang pagsagol kun pagsakot nianang Espirituha.
- B. Sa Espiritu sa Dios pa ang Espiritu, duna ra Siyay diosnong elemento; sa nahimo na Siyang Espiritu ni Jesucristo pinaagi sa pagpakatawo, pagkalansang sa krus, ug pagkabanhaw ni Cristo, naa nay diosnon ug tawhanong elemento

ang Espiritu, nga naglakip na sa tanang pagkamao ug realidad sa pagpakatawo, pagkalansang sa krus, ug pagkabanhaw ni Cristo.

- C. Kining malangkobon-sa-tanan nga sinagol nga Espiritu, nga gihulagwayan sa balaang lana nga igdihog, mao ang madagayaong sangkap sa Espiritu ni Jesucristo, ang sangkap sa Lawas ni Cristo, nga pinaagi niini makakinabuhi ta ni Cristo aron mapadako Siya diha sa Lawas, pinaagi sa Lawas, ug alang sa Lawas—Fil. 1:19-21a.

IV. Isip mga magtutuo, gidihogan na ta sa sinagol nga igdihog, sa malangkobon-sa-tanan nga Espiritu; gisaysay sa Salmo 133:2 ang pagdaligdig sa lanang igdihog gikan sa ulo ni Aaron paingon sa iyang bungot ug unya sa sidsid sa iyang mga bisti; nagtimaan kini nga gidihogan sa Espiritu ang tibuok Lawas:

- A. Ang sukaranan sa pagkausa mao ra ang nahikay nga Tulo-usang Dios nga balaang lana nga igdihog, ang sinagol nga Espiritu, nga giaplikar sa atong pagkatawo—vv. 1-3.
- B. Aron “mapintalan” sa igdihog (1 Juan 2:20, 27), mausa gyod ta sa iglesia; natural dayon tang makapahimulos sa pag-aplikar sa lanang igdihog ug sa tanang elemento niini; pagkatahom gyod sa pagkausang napalugwa sa pag-aplikar ning igdihoga!